

“РЎЙХАТГА ОЛИНГАН”

Ўзбекистон Республикаси
Адлия вазирлиги
Самарқанд вилоят Адлия бошқармаси
томонидан
2014 йил “_____” _____
№_____ - рақам билан

“ТАСДИҚЛАНГАН”

Самарқанд вилоят “Пахтасаноат”
худудий очик акциядорлик
бирлашмаси акциядорларининг
2014 йил 21 июндаги умумий
йиғилишида

**“Samarqandpaxtasanoat”
hududiy aksiyadorlik birlashmasi**

УСТАВИ

Самарқанд шаҳри – 2014 й.

1. УМУМИЙ ҚОИДАЛАР

1.1. Ўзбекистон Республикаси Президентининг 2001 йил 11 июндаги ПФ2874-сонли “Республика пахта тозалаш саноатини монополиядан чиқариш ва бошқаришни такомиллаштириш чора-тадбирлари тўғрисида”ги Фармони ҳамда Вазирлар Маҳкамасининг 2001 йил 12 июндаги 252- сонли “Республика пахта тозалаш саноатини бошқариш тизимини такомиллаштириш тўғрисида”ги Қарори асосида “Ўзпахтасаноат” уюшмаси тизимида Samarqand viloyat “Paxtasanoat” hududiy ochiq aksiyadorlik birlashmasi ташкил этилган.

Бирлашма акциядорларининг 2014 йил 21 июндаги умумий йиғилишида бирлашманинг фирма номи Samarqand viloyat “Paxtasanoat” hududiy ochiq aksiyadorlik birlashmasidan “Samarqandpaxtasanoat” hududiy aksiyadorlik birlashmasi номига ўзгартирилди.

Ушбу Устав Ўзбекистон Республикасининг “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Қонуни ва бошқа амалдаги қонун ҳужжатлари асосида ишлаб чиқилган.

1.2. “Samarqandpaxtasanoat” hududiy aksiyadorlik birlashmasi (матн давомида – Бирлашма) ўз фаолиятини Ўзбекистон Республикасининг “Фуқаролик” Кодекси, “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Қонуни (06.05.2014 й. ЎРҚ-370-сон) (матн давомида – Қонун) ва бошқа меъёрий-ҳуқуқий ҳужжатларга мувофиқ олиб боради.

1.3. Бирлашма фаолият кўрсатиш муддати чекланмаган муддатга ташкил этилган.

1.4. Бирлашманинг жойлашган ери (почта манзили): Ўзбекистон Республикаси, Самарқанд вилояти, Самарқанд шаҳри, Мирзо Улуғбек кўчаси, 50- уй. Индекс: 140120.

1.5. Бирлашманинг электрон почта манзили (E-mail): ikt@sampaxta.uz

Бирлашманинг расмий веб-сайти: www.sampaxta.uz

1.6. Бирлашманинг тўлиқ фирма номи:

Ўзбек тилида:

- кирилл алифбосида – “Самарқандпахтасаноат” ҳудудий акциядорлик бирлашмаси.
- лотин алифбосида – “Samarqandpaxtasanoat” hududiy aksiyadorlik birlashmasi.

Рус тилида:

- территориальное акционерное объединение «Самаркандпхтасаноат».

Бирлашманинг қисқартирилган фирма номи:

Ўзбек тилида:

- кирилл алифбосида – “Самарқандпахтасаноат» ХАБ.
- лотин алифбосида – “Samarqandpaxtasanoat” НАВ.

Рус тилида:

- ТАО «Самаркандпхтасаноат».

2. ФАОЛИЯТИНИНГ СОҲАСИ (АСОСИЙ ЙЎНАЛИШЛАРИ) ВА МАҚСАДИ

2.1. Бирлашма тижорат такшилотини бўлиб, унинг асосий мақсади молиявий-хўжалик фаолиятдан фойда олишдир.

2.2. Бирлашма Ўзбекистон Республикаси Вазирлар Маҳкамасининг 2001 йил 12 июндаги 252- сонли “Республика пахта тозалаш саноатини бошқариш тизимини такомиллаштириш тўғрисида”ги Қарорига мувофиқ ўз тизими таркибига кирувчи пахта тозалаш корхоналарининг (шунингдек тизимдаги бошқа корхоналарнинг) ишлаб чиқариш, молиявий-хўжалик фаолиятини мувофиқлаштириш, уларнинг самарали ишлашларини ташкил этиш ва назорат қилиш билан шуғулланади.

2.3. Бирлашма мақсад ва вазифаларга эришиш учун куйидаги фаолият турларини амалга оширади:

- хизмат кўрсатувчи банклар иштирокида пахта заводлари орқали пахта хом ашёсини харид қилиш ва қайта ишлаш юзасидан пахта етиштирувчи қишлоқ хўжалиги корхоналари ва фермер хўжаликлари билан контракция шартномалари тузиш, шунингдек пахтани қайта ишлаш маҳсулотларини экспортга ва ички бозорга етказиб бериш юзасидан Ўзбекистон Республикаси Ташқи иқтисодий алоқалар вазирлигининг

ташқи савдо компаниялари ва мамлакатимиздаги истеъмолчилар билан шартномалар тузиш;

- пахта хомашёси харид қилиш ва қайта ишлаш бозор механизмларини ривожлантириш, жаҳон бозорида рақобатга бардошли юқори сифатли пахта маҳсулотлари ишлаб чиқаришдан қишлоқ хўжалиги ва пахта тозалаш корхоналарининг иқтисодий манфаатдорлигини кучайтириш;
- тузилган контрактация шартномаларига мувофиқ пахта хомашёси харид қилиш ва уни ўз вақтида қайта ишлашни ҳамда пахта маҳсулотини экспортга ва ички бозорга етказиб беришни ташкил этиш;
- пахта етиштирувчи хўжаликларни пахтанинг жаҳон бозорида харидоргир бўлган селекция навларининг юқори кондицияли уруғлик чигитлари билан таъминлаган ҳолда уруғлик пахта хомашёсининг сифатли қабул қилиниши, сақланиши ва қайта ишланишини ташкил этиш;
- пахта хомашёсини харид қилиш, пахта толаси ва бошқа пахта маҳсулотлари ишлаб чиқариш, истеъмолчиларга жўнатиш ва шу маҳсулотларнинг қолдиқлари бўйича ҳисоб-китоб ва ҳисобот юритиш, пахта хомашёси харид қилиш, пахта маҳсулотлари ишлаб чиқариш ҳажмлари, уни экспортга ва республика истеъмолчиларига сотиш бўйича маълумотларнинг ишончилигини таъминлаш;
- пахта тозалаш корхоналарини техник жиҳатдан қайта жиҳозлаш ва замонавийлаштириш бўйича ягона сиёсатни амалга ошириш, чет эл инвестицияларини жалб этиш ва пахта тозалаш корхоналарини ривожлантириш учун шарт-шароитлар яратиш;
- ўз ваколатлари доирасида ва қонун ҳужжатларида назарда тутилган бошқа фаолиятни амалга ошириш;

2.4. Бирлашма фаолияти юқорида белгиланган фаолият турлари билан чегараланмайди. Бирлашма амалдаги қонунчилик ва мазкур Уставга зид бўлмаган фаолиятни амалга ошириш учун зарур бўлган ҳуқуқ ва мажбуриятларга эга бўлиши мумкин.

2.5. Бирлашманинг хўжалик ва бошқа фаолиятига давлат ва бошқа ташкилотлар томонидан аралашувига йўл қўйилмайди, агар бу Бирлашма фаолиятини белгиланган тартибда назорат қилиш ҳуқуқи билан боғлиқ бўлмаса.

3. БИРЛАШМА УСТАВ ФОНДИ (УСТАВ КАПИТАЛИ) МИҚДОРИ

3.1. Бирлашманинг устав фонди акциядорлар олган Бирлашма акцияларининг номинал қийматидан ташкил топади ва Ўзбекистон Республикасининг миллий валютасида ифодаланади.

3.2. Бирлашма томонидан чиқариладиган барча акцияларнинг номинал қиймати бир хил бўлади.

3.3. Бирлашманинг устав фонди Бирлашма мол-мулкининг Бирлашма кредиторлари манфаатларини кафолатлайдиган энг кам миқдорини белгилайди.

3.4. Бирлашма устав фондининг миқдори 2 248 046 316 сўмни ташкил қилади ва номинал қиймати 1 146 сўм бўлган 1 961 646 дона эгасининг номи ёзилган оддий акциялардан иборат.

3.5. Бирлашма Устав фонди куйидаги тартибда тақсимланган:

Давлат улуши - 51% (эллик бир фоиз), 1 146 504 240 (бир миллиард бир юз кирк олти миллион беш юз тўрт минг икки юз кирк) сум ёки 1 000 440 (бир миллион тўрт юз кирк) дона оддий акция;

Юридик ва жисмоний шахслар улуши - 49% (кирк туккиз фоиз), 1 101 542 076 (бир миллиард бир юз бир миллион беш юз кирк икки минг етмиш олти) сум ёки 961 206 (туккиз юз олти минг бир минг икки юз олти) дона оддий акция.

а) Бирлашма устав фондини қўпайтириш.

3.5. Бирлашма устав фонди акциялар номинал қийматини ошириш ёки қўшимча акцияларни жойлаштириш йўли билан қўпайтирилиши мумкин.

3.6. Бирлашма ўзи чиқараётган акцияларни амалдаги қонун ҳужжатлари талаблари асосида очик ёки ёпиқ обуна йўли билан жойлаштиришга ҳақли.

3.7. Бирлашма устав фондини акциялар номинал қийматини ошириш йўли билан кўпайтириш ва Бирлашма уставига тегишли ўзгартишлар киритиш тўғрисидаги қарор Бирлашма кузатув кенгаши томонидан қабул қилинади.

3.8. Қўшимча акциялар Бирлашма томонидан уставда белгиланган эълон қилинган акциялар сони доирасидагина жойлаштирилиши мумкин.

3.9. Қўшимча акцияларни жойлаштириш йўли билан Бирлашма устав фондини кўпайтириш тўғрисидаги қарор Бирлашма кузатув кенгаши томонидан қабул қилинади.

3.10. Бирлашма устав фондини ошириш мақсадида жойлаштирилган акцияларига қўшимча равишда чиқариши мумкин бўлган эълон қилинган акциялари миқдори – 581 728 дона эгаси ёзилган нақдсиз (хужжатсиз) шаклидаги оддий акциялардан иборат.

б) Бирлашма устав фондини камайтириш.

3.11. Бирлашма устав фонди акцияларнинг номинал қийматини ёки уларнинг умумий сонини қисқартириш йўли билан, шу жумладан, акцияларнинг бир қисмини Бирлашманинг ўзи кейинчалик муомаладан чиқариш шarti билан сотиб олиши йўли билан камайтирилиши мумкин.

3.12. Агар устав фондини камайтириш натижасида унинг миқдори Бирлашманинг уставига киритилган тегишли ўзгартиришларни рўйхатдан ўтказиш куни белгиланадиган Бирлашма устав фондининг энг кам миқдоридан қонун ҳужжатларида белгиланганидан камайиб кетадиган бўлса, Бирлашма устав фондини камайтиришга ҳақли эмас.

3.13. Устав фондини камайтириш ва Бирлашма уставига тегишли ўзгартишлар киритиш ҳақидаги қарор акциядорларнинг умумий йиғилиши томонидан қабул қилинади.

4. БИРЛАШМА АКЦИЯЛАРИНИНГ СОНИ, НОМИНАЛ ҚИЙМАТИ, ТУРЛАРИ (ОДДИЙ)

4.1. Бирлашма акцияларининг сони 1 961 646 дона бўлиб, ҳар бирининг номинал қиймати 1 146 сўмдан иборат.

4.2. Бирлашманинг оддий акциялари овоз берувчи акциялар бўлиб, улар ўз эгасига дивидендлар олиш, Бирлашмани бошқаришда иштирок этиш ҳуқуқини беради.

5. БИРЛАШМА АКЦИЯЛАРИНИ ЖОЙЛАШТИРИШ ТАРТИБИ

5.1. Бирлашма акцияларни ва акцияларга айирбошланадиган қимматли қоғозларни очиқ ва ёпиқ обуна воситасида жойлаштиради.

5.2. Акцияларнинг очиқ обунаси фақат қимматли қоғозларнинг биржа бозорида ва уюшган биржадан ташқари бозорида ўтказилади.

5.3. Бирлашма томонидан акциялар ва акцияларга айирбошланадиган қимматли қоғозларни жойлаштириш (очиқ ёки ёпиқ обуна) усуллари Бирлашма акциядорлар умумий йиғилишининг қарори билан белгиланади.

5.4. Бирлашманинг қўшимча акциялари ва бошқа қимматли қоғозларини жойлаштириш чоғида уларга ҳақ тўлаш уларни чиқариш тўғрисидаги қарорда белгиланганидан кам бўлмаган нарх бўйича амалга оширилади.

6. БИРЛАШМАНИНГ ЖОЙЛАШТИРИЛГАН АКЦИЯЛАРИГА ДИВИДЕНДЛАР ТўЛАШ ТАРТИБИ

6.1. Дивиденд Бирлашма соф фойдасининг акциядорлар ўртасида тақсимланадиган қисмидир.

6.2. Бирлашма акциялари бўйича эълон қилинган дивидендларни тўлашга мажбур.

6.3. Акциядорлар умумий йиғилиши қарорига биноан дивиденд пул маблағлари ёки бошқа қонуний тўлов воситалари билан тўланиши мумкин.

Дивиденд акциядорлар ўртасида уларга тегишли акцияларнинг сони ва турига мутаносиб равишда тақсимланади.

6.4. Бирлашма йилнинг ҳар чорагида, ярим йилда ёки йилига бир марта жойлаштирилган акциялар бўйича дивидендлар тўлаш тўғрисида қарор қабул қилишга (эълон қилишга) ҳақлидир.

6.5. Акциялар бўйича дивидендлар тўлаш, дивиденднинг миқдори, уни тўлаш шакли ва тартиби тўғрисидаги қарор Бирлашма кузатув кенгашининг тавсияси, молиявий ҳисоботнинг ишончилиги ҳақида аудиторлик хулосаси мавжуд бўлган тақдирда, молиявий ҳисобот маълумотлари асосида акциядорларнинг умумий йиғилиши томонидан қабул қилинади. Дивидендларнинг миқдори Бирлашма кузатув кенгаши томонидан тавсия этилган миқдордан кўп бўлиши мумкин эмас. Дивидендлар тўлаш тўғрисидаги қарорда дивидендлар тўлаш бошланадиган ва тугалланадиган саналар кўрсатилади.

6.6. Дивидендлар Бирлашма тасарруфида қоладиган соф фойдадан ва (ёки) ўтган йилларнинг тақсимланмаган фойдасидан тўланади.

Дивидендлар тўлаш муддати ва тартиби акциядорларнинг умумий йиғилиши қарори билан белгиланади. Дивидендлар тўлаш муддати шундай қарор қабул қилинган кундан эътиборан 60 кундан кеч бўлмаслиги лозим.

6.7. Бирлашма:

- агар дивидендлар тўланадиган пайтда Бирлашмада банкротлик белгилари мавжуд бўлса ёки Бирлашмада шундай белгилар дивидендларни тўлаш натижасида пайдо бўлса;

- агар Бирлашма соф активларининг қиймати унинг устав фонди ва захира фонди суммасидан кам бўлса, акциялар бўйича дивидендлар тўлаш тўғрисида қарор қабул қилишга ҳамда дивидендлар тўлашга ҳақли эмас.

6.8. Бирлашма дивидендлар миқдорини улардан ундириладиган солиқларни инобатга олмаган ҳолда эълон қилади.

6.9. Эгаси ёки эгасининг қонуний ҳуқуқий вориси ёхуд меросхўри томонидан уч йил ичида талаб қилиб олинмаган дивиденд акциядорларнинг умумий йиғилиши қарорига кўра Бирлашма ихтиёрида қолади.

7. БИРЛАШМАНИНГ ЗАХИРА ФОНДИ

7.1. Бирлашма соф фойда ҳисобидан захира фонди ва Бирлашма фаолияти учун зарур бўлган бошқа фондларни тузиши мумкин.

7.2. Захира фонди Бирлашма устав фонди миқдорининг 15 фоизидан кам бўлмаган миқдорда тузилади.

7.3. Бирлашманинг захира фонди 7.2. бандда белгиланган миқдорга етгунига қадар ҳар йили соф фойдадан 5% дан кам бўлмаган миқдорда мажбурий ажратмалар ўтказиш орқали ташкил этилади.

7.4. Агар захира фонди маблағларининг ҳаммаси ёки бир қисми сарфланган тақдирда мажбурий ажратмалар, захира фондининг 7.2.-бандда белгиланган миқдорга етгунига қадар, қайта амалга оширилади.

7.5. Бошқа маблағлар мавжуд бўлмаган тақдирда, Бирлашманинг захира фонди Бирлашманинг зарарлари ўрнини қоплаш, Бирлашманинг корпоратив облигацияларини муомаладан чиқариш, имтиёзли акциялар бўйича дивидендлар тўлаш ва Бирлашманинг акцияларини қайтариб сотиб олиш учун мўлжалланади.

Захира фондидан бошқа мақсадларда фойдаланиш мумкин эмас.

8. БИРЛАШМА БОШҚАРУВ ТУЗИЛМАСИ

8.1. Бирлашманинг бошқарув органлари қуйидагилардан иборат:

- Акциядорларнинг умумий йиғилиши;
- Кузатув Кенгаши;
- Ижроия органи (Бошқарув).

9. АКЦИЯДОРЛАРНИНГ УМУМИЙ ЙИҒИЛИШИ

9.1. Акциядорларнинг умумий йиғилиши Бирлашманинг юқори бошқарув органидир.

Акциядорларнинг умумий йиғилиши ўз фаолиятини амалдаги қонун ҳужжатлари, мазкур Устав ва “Бирлашма акциядорларининг умумий йиғилиши тўғрисида”ги Низомга асосан амалга оширади.

9.2. Акциядорларнинг умумий йиғилишини Бирлашма кузатув кенгашининг раиси, у узрли сабабларга кўра бўлмаган тақдирда эса, Бирлашма кузатув кенгашининг аъзоларидан бири олиб боради.

9.3. Бирлашма ҳар йили акциядорларнинг умумий йиғилишини (акциядорларнинг йиллик умумий йиғилишини) ўтказиши шарт.

9.4. Акциядорларнинг йиллик умумий йиғилиши молия йили тугаганидан кейин олти ойдан кечиктирмай ўтказилади.

9.5. Акциядорларнинг йиллик умумий йиғилишидан ташқари ўтказиладиган умумий йиғилишлари навбатдан ташқари йиғилишлардир.

9.6. Акциядорлар умумий йиғилишининг ваколат доирасига қуйидагилар киради:

а) Бирлашма уставига ўзгартиш ва қўшимчалар киритиш ёки Бирлашманинг янги таҳрирдаги уставини тасдиқлаш (Бирлашма уставига устав фондини акциялар номинал қийматини ошириш йўли билан кўпайтириш билан боғлиқ тегишли ўзгартишлар ва қўшимчалар киритиш ҳоллари бундан мустасно);

б) Бирлашмани қайта ташкил этиш;

в) Бирлашмани тугатиш, тугатувчини (тугатиш комиссиясини) тайинлаш ҳамда оралик ва якуний тугатиш балансларини тасдиқлаш;

г) Бирлашма кузатув кенгашининг ва миноритар акциядорлар қўмитасининг сон таркибини белгилаш, уларнинг аъзоларини сайлаш ва аъзоларнинг ваколатларини муддатидан илгари тугатиш;

д) эълон қилинган акцияларнинг энг кўп миқдорини белгилаш;

е) Бирлашманинг устав фондини (устав капитални) камайтириш;

ж) ўз акцияларини олиш;

з) Бирлашманинг ташкилий тузилмасини тасдиқлаш;

и) аудиторлик текширувини ўтказиш тўғрисида, аудиторлик ташкилотини ва унинг хизматларига тўланадиган ҳақнинг энг кўп миқдорини белгилаш ҳақида қарор қабул қилиш;

к) Бирлашма тафтиш комиссиясининг аъзоларини (тафтишчисини) сайлаш ва уларнинг ваколатларини муддатидан илгари тугатиш, шунингдек тафтиш комиссияси (тафтишчи) тўғрисидаги низомни тасдиқлаш;

л) Бирлашманинг йиллик ҳисоботини тасдиқлаш;

м) Бирлашманинг фойда ва зарарларини тақсимлаш;

н) Бирлашма кузатув кенгашининг ўз ваколат доирасига кирадиган масалалар юзасидан, шу жумладан Бирлашмани бошқаришга доир қонун ҳужжатларида белгиланган талабларга риоя этилиши юзасидан ҳисоботини эшитиш;

о) Бирлашма тафтиш комиссиясининг (тафтишчисининг) ўз ваколат доирасига кирадиган масалалар юзасидан, шу жумладан Бирлашмани молия-хўжалик фаолиятини текшириш яқунлари бўйича ҳисобот ва ҳулосаларини эшитиш;

п) имтиёзли ҳуқуқни қўлламаслик тўғрисида қонун ҳужжатларида назарда тутилган қарорни қабул қилиш;

р) акциядорлар умумий йиғилишининг регламентини тасдиқлаш;

с) акцияларни майдалаш ва йириклаштириш;

т) қонун ҳужжатларида белгиланган тартибда Бирлашма томонидан йирик битимлар ва Бирлашманинг аффилиланган шахслари билан битимлар тузиш тўғрисида қарор қабул қилиш;

у) амалдаги қонунчилик ва мазкур Уставда кўзда тутилган бошқа масалаларни ҳал этиш.

Акциядорлар умумий йиғилишининг ваколат доирасига киритилган масалалар Бирлашманинг Кузатув кенгаши ҳал қилиши учун берилиши мумкин эмас, Қонунда назарда тутилган ҳоллар бундан мустасно.

Акциядорлар умумий йиғилишининг ваколат доирасига киритилган масалалар Бирлашманинг ижроия органи ҳал қилиши учун берилиши мумкин эмас.

9.7. Акциядорларнинг умумий йиғилишида овозга қўйилган масалалар бўйича Бирлашманинг оддий акциялари эгалари бўлган акциядорлар овоз бериш ҳуқуқига эга бўлади.

9.8. Овозга қўйилган масалалар бўйича акциядорлар умумий йиғилишининг қарори қонун ҳужжатларида белгиланган тартибда қабул қилинади.

9.9. Акциядорларнинг умумий йиғилиши кун тартибига киритилмаган масалалар бўйича қарор қабул қилишга, шунингдек кун тартибига ўзгартишлар киритишга ҳақли эмас.

9.10. Акциядорларнинг умумий йиғилиши томонидан қабул қилинган қарорлар, шунингдек овоз бериш яқунлари қонун ҳужжатларида ҳамда ушбу уставда назарда тутилган тартибга асосан

ушбу қарорлар қабул қилинган санадан эътиборан ўттиз кундан кечиктирмай акциядорлар эътиборига етказилади.

9.11. Акциядорларнинг умумий йиғилишида иштирок этиш ҳуқуқига акциядорларнинг умумий йиғилиши ўтказиладиган санадан уч иш куни олдин шакллантирилган Бирлашма акциядорларнинг реестрида қайд этилган акциядорлар эга бўлади.

9.12. Акциядорларнинг умумий йиғилишини ўтказиш тўғрисидаги хабар акциядорларнинг умумий йиғилиши ўтказиладиган санадан камида етти кундан кечиктирмай, лекин узоғи билан ўттиз кун олдин Бирлашманинг расмий веб-сайтида, оммавий ахборот воситаларида эълон қилинади, шунингдек акциядорларга электрон почта орқали юборилади.

9.13. Бирлашма овоз берувчи акцияларининг ҳаммаси бўлиб камида бир фоизига эгалик қилувчи акциядорлар (акциядор) Бирлашманинг молия йили тугаганидан кейин олти ойдан кечиктирмай акциядорларнинг йиллик умумий йиғилиши кун тартибига масалалар киритишга ҳамда Бирлашма кузатув кенгаши ва тафтиш комиссиясига (тафтишчилигига) бу органнинг миқдор таркибидан ошмайдиган тарзда номзодлар кўрсатишга ҳақли. Шунингдек, Акциядорлар (акциядор) Бирлашма кузатув кенгаши ва тафтиш комиссиясига (тафтишчилигига) ўзлари кўрсатган номзодлар рўйхатига акциядорларнинг йиллик умумий йиғилиши ўтказилиши тўғрисидаги хабар эълон қилинган санадан эътиборан уч иш кундан кечиктирмай ўзгартишлар киритишга ҳақли.

9.14. Акциядорларнинг умумий йиғилиши ўтказиладиган сана уни ўтказиш тўғрисида қарор қабул қилинган кундан эътиборан ўн кундан кам ва ўттиз кундан кўп этиб белгиланиши мумкин эмас.

9.15. Акциядорларнинг навбатдан ташқари умумий йиғилиши Бирлашма кузатув кенгашининг қарорига кўра унинг ўз ташаббуси асосида, тафтиш комиссиясининг (тафтишчининг) ёзма талаби, шунингдек ёзма талаб тақдим этилган санада Бирлашма овоз берувчи акцияларининг камида беш фоизига эгалик қилувчи акциядорнинг (акциядорларнинг) ёзма талаби асосида ўтказилади.

9.16. Агар акциядорларнинг умумий йиғилишида иштирок этиш учун рўйхатдан ўтказиш тугалланган пайтда Бирлашманинг жойлаштирилган овоз берувчи акцияларининг жами эллик фоизидан кўпроқ овозига эга бўлган акциядорлар (уларнинг вакиллари) рўйхатдан ўтган бўлса, акциядорларнинг умумий йиғилиши ваколатли (кворумга эга) бўлади.

9.17. Акциядорларнинг умумий йиғилишини ўтказиш учун кворум бўлмаса, акциядорларнинг такрорий умумий йиғилишини ўтказиш санаси эълон қилинади. Акциядорларнинг такрорий умумий йиғилишини ўтказишда кун тартибини ўзгартиришга йўл кўйилмайди.

9.18. Агар акциядорларнинг ўтказилмай қолган йиғилиши ўрнига чакирилган такрорий умумий йиғилишида иштирок этиш учун рўйхатдан ўтказиш тугалланган пайтда Бирлашманинг жойлаштирилган овоз берувчи акцияларининг жами қирқ фоизидан кўпроқ овозига эга бўлган акциядорлар (уларнинг вакиллари) рўйхатдан ўтган бўлса, акциядорларнинг такрорий умумий йиғилиши ваколатли бўлади.

9.19. Акциядорларнинг умумий йиғилишида овоз бериш «Бирлашманинг овоз берувчи битта акцияси — битта овоз» принципи бўйича амалга оширилади, Бирлашманинг кузатув кенгаши аъзоларини сайлаш бўйича кумулятив овоз беришни ўтказиш ҳоллари бундан мустасно.

9.20. Акциядорларнинг умумий йиғилишида кун тартиби масалалари бўйича овоз бериш овоз бериш бюллетенлари орқали амалга оширилади.

9.21. Овоз бериш яқунлари бўйича санок комиссияси овоз бериш яқунлари тўғрисида баённома тузади, баённома жумладан акциядорлар умумий йиғилишининг кворуми мавжудлиги тўғрисидаги маълумотларни ҳам ўз ичига олади ва санок комиссиясининг аъзолари томонидан имзоланади.

9.22. Акциядорлар умумий йиғилишининг баённомаси акциядорларнинг умумий йиғилиши ёпилганидан кейин ўн кундан кечиктирмай икки нусхада тузилади. Ҳар иккала нусха ҳам умумий йиғилишда раислик қилувчи ва умумий йиғилиш котиби томонидан имзоланади.

10. БИРЛАШМА КУЗАТУВ КЕНГАШИ

10.1. Бирлашманинг кузатув кенгаши Бирлашма фаолиятига умумий раҳбарлик қилади, ушбу Устав ва қонунчилик билан акциядорлар умумий йиғилишининг мутлақ ваколатларига киритилган масалаларни ҳал этиш бундан мустасно.

Бирлашма кузатув кенгаши ўз фаолиятини амалдаги қонун ҳужжатлари, мазкур Устав ва “Бирлашма кузатув кенгаши тўғрисида”ги Низомга асосан амалга оширади.

10.2. Бирлашма кузатув кенгашининг ваколатлари қуйидагилардан иборат:

- Бирлашма фаолиятининг устувор йўналишларини белгилаш;
- Бирлашма акциядорларининг йиллик ва навбатдан ташқари умумий йиғилишларини чақириш, қонунчиликда назарда тутилган ҳоллар бундан мустасно;
- акциядорлар умумий йиғилишининг қун тартибини тайёрлаш;
- акциядорларнинг умумий йиғилиши ўтказиладиган сана, вақт ва жойни белгилаш;
- акциядорларнинг умумий йиғилиши ўтказилиши ҳақида хабар қилиш учун Бирлашма акциядорлари реестрини шакллантириш санасини белгилаш;
- Бирлашма уставига ўзгартириш ва қўшимчалар киритиш ёки янги таҳрирдаги уставни тасдиқлаш тўғрисидаги масалаларни акциядорлар умумий йиғилишига киритиш (Бирлашма уставига устав фондини акциялар номинал қийматини ошириш йўли билан кўпайтириш билан боғлиқ тегишли ўзгартишлар ва қўшимчалар киритиш ҳоллари бундан мустасно);
- мол-мулкнинг бозор қийматини белгилашни ташкил қилиш;
- Бирлашманинг йиллик бизнес-режасини тасдиқлаш;
- йилнинг ҳар чораги яқунлари бўйича ижроия органи ва ички аудит хизмати ҳисоботларини эшитиш ҳамда унинг натижалари бўйича тегишли чора-тадбирлар белгилаш;
- ички аудит хизматини ташкил этиш, унинг ходимларини тайинлаш ва харажатларининг йиллик сметасини тасдиқлаш, шунингдек ҳар чоракда унинг ҳисоботларини эшитиб бориш;
- Бирлашманинг ижроия органини тузиш, Бирлашма бошқарув раиси ва бошқарув аъзоларини сайлаш (тайинлаш), уларнинг ваколатларини муддатидан илгари тугатиш масалаларини ҳал қилиш;
- Бирлашма ижроия органининг фаолиятига дахлдор ҳар қандай ҳужжатлардан эркин фойдаланиш ва Бирлашма кузатув кенгаши зиммасига юклатилган вазифаларни бажариш учун бу ҳужжатларни ижроия органидан олиш. Бирлашма кузатув кенгаши ва унинг аъзолари олинган ҳужжатлардан фақат хизмат мақсадларида фойдаланиши мумкин;
- ижроия органига тўланадиган ҳақ ва компенсациялар миқдорларини белгилаш;
- Бирлашма тафтиш комиссияси аъзоларига (тафтишчисига) тўланадиган ҳақ ва компенсация миқдори юзасидан ҳамда аудиторлик ташкилотининг хизматларига тўланадиган ҳақ миқдори чегарасини белгилашга доир тавсиялар бериш;
- акциялар бўйича дивидендлар миқдори ва уларни тўлаш тартиби юзасидан тавсиялар бериш;
- Бирлашманинг захира ва бошқа фондларидан фойдаланиш;
- Бирлашманинг бошқарув органлари фаолият тартибини белгиловчи ҳужжатларни тасдиқлаш;
- Бирлашманинг ваколатхоналарини очиш ҳамда филиалларини ташкил этиш;
- Бирлашманинг шўъба ва тобе корхоналарини ташкил этиш;
- қонунчиликда белгиланган ҳолларда битимлар тузиш ҳақида қарор қабул қилиш;
- Бирлашманинг тижорат ва нотижорат ташкилотлардаги иштироки билан боғлиқ битимларни қонун ҳужжатларида белгиланган тартибда тузиш;
- Бирлашманинг устав фондини (устав капиталини) кўпайтириш масалаларини, шунингдек Бирлашма уставига устав фондини акциялар номинал қийматини ошириш йўли билан кўпайтириш билан боғлиқ тегишли ўзгартишлар ва қўшимчалар киритиш тўғрисидаги масалаларни ҳал қилиш;
- қонунчиликда белгиланган ҳолларда акцияларни жойлаштириш (қимматли қоғозларнинг биржа бозорига ва уюшган биржадан ташқари бозорига чиқариш) нархини белгилаш;
- Бирлашма томонидан корпоратив облигациялар, шу жумладан акцияларга айирбошланадиган облигациялар чиқариш тўғрисида қарор қабул қилиш;
- қимматли қоғозларнинг ҳосилаларини чиқариш тўғрисида қарор қабул қилиш;
- ушбу Устав ва қонунчиликка мувофиқ кузатув кенгаши ваколатларига киритилган бошқа масалаларни ҳам ҳал этиш.

Бирлашма кузатув кенгашининг ваколатларига киритилган масалаларни ҳал қилиш, Бирлашма ижроия органига ўтказилиши мумкин эмас.

10.3. Бирлашма кузатув кенгашининг аъзолари ушбу Устав ва қонунчиликда назарда тутилган тартибда акциядорларнинг умумий йиғилиши томонидан бир йил муддатга сайланадилар.

10.4. Бирлашма кузатув кенгаши таркибига сайланган шахсларнинг қайта сайланишлари чекланмайди.

10.5. Бирлашма кузатув кенгашининг миқдор таркиби 5 (беш) аъзодан иборат.

10.6. Бирлашма ижроия органининг аъзолари кузатув кенгашига сайланишлари, тайинланишлари мумкин эмас. Бирлашмада меҳнат шартномаси (контракт) бўйича ишлаётган шахслар Бирлашманинг кузатув кенгаши аъзолари бўлиши мумкин эмас.

10.7. Кузатув кенгаши таркибига қонунда назарда тутилган тартибда Бирлашманинг акциядорлари ҳисобланмаган шахслар ҳам сайланиши мумкин.

10.8. Бирлашма кузатув кенгаши таркибига сайланадиган шахсларга нисбатан қўйиладиган талаблар “Бирлашма Кузатув кенгаши тўғрисида”ги Низом билан белгиланади.

10.9. Бирлашманинг кузатув кенгаши аъзолари сайлови кумулятив овоз бериш орқали амалга оширилади. Акциядор ўзига тегишли акциялар бўйича овозларни Бирлашма кузатув кенгашининг битта номзодига тўлиқ беришга ёки бир нечта номзод ўртасида тақсимлашга ҳақлидир.

10.10. Энг кўп овоз тўплаган номзодлар кузатув кенгаши таркибига сайланган деб ҳисобланади.

10.11. Бирлашма кузатув кенгашининг раиси кузатув кенгаши аъзолари томонидан уларнинг ўзлари орасидан кузатув кенгаши аъзолари умумий сонига нисбатан кўпчилик овоз билан сайланади.

10.12. Бирлашма кузатув кенгаши ўз раисини кузатув кенгаши жами аъзоларининг кўпчилик овози билан қайта сайлашга ҳақлидир.

10.13. Бирлашма кузатув кенгашининг раиси унинг ишини ташкил этади, кузатув кенгаши мажлисларини чақиради ва уларда раислик қилади, мажлисда баённома юритилишини ташкил этади, акциядорлар умумий йиғилишида раислик қилади.

10.14. Бирлашма кузатув кенгашининг раиси йўқлигида унинг вазифасини кузатув кенгаши аъзоларидан бири бажариб туради.

10.15. Бирлашма номидан Бирлашма бошқарув раиси билан тузиладиган шартнома Кузатув кенгаши раиси томонидан имзоланади.

10.16. Бирлашма кузатув кенгашининг мажлиси кузатув кенгашининг раиси томонидан унинг ўз ташаббуси билан, кузатув кенгашининг аъзоси, тафтиш комиссиясининг, Бирлашма ижроия органининг, шунингдек Бирлашма овоз берувчи акцияларининг камида беш фоизига эгалик қилувчи акциядорнинг (акциядорларнинг) талабига биноан чақирилади.

Бирлашма кузатув кенгашининг мажлисини чақириш ва ўтказиш тартиби мазкур Устав ва “Бирлашма Кузатув кенгаши тўғрисида”ги Низомда белгилаб қўйилади.

Кузатув кенгаши мажлислари ҳар чоракда камида бир маротаба ўтказилади.

10.17. Кузатув кенгаши мажлисини ўтказиш учун кворум кузатув кенгашига сайланган аъзоларнинг етмиш беш фоизидан кам бўлмаслиги керак.

10.18. Овозга қўйилган масалалар бўйича кузатув кенгашининг қарори қонун ҳужжатларида белгиланган тартибда қабул қилинади.

10.19. Бирлашма кузатув кенгаши аъзоларининг сони Бирлашма уставида назарда тутилган миқдорнинг етмиш беш фоизидан кам бўлган тақдирда, Бирлашма кузатув кенгашининг янги таркибини сайлаш учун акциядорларнинг навбатдан ташқари умумий йиғилишини чақириши шарт. Кузатув кенгашининг қолган аъзолари акциядорларнинг бундай навбатдан ташқари умумий йиғилишини чақириш тўғрисида қарор қабул қилишга ҳақлидир.

11. БИРЛАШМАНИНГ ИЖРОИЯ ОРГАНИ

11.1. Бирлашманинг кундалик фаолиятига раҳбарлик қилиш ваколати коллегиял ижроия орган - Бирлашма Бошқаруви томонидан амалга оширилади. Бошқарув фаолиятига Бирлашма Бошқарув раиси раҳбарлик қилади.

11.2. Бирлашма Бошқаруви коллегиял ижроия орган асосидаги ижро этувчи орган ҳисобланиб, унинг кундалик фаолиятини бошқаради ва оператив раҳбарликни Ўзбекистон Республикаси қонунчилиги, Бирлашма устави, акциядорлар умумий йиғилиши ва Бирлашма Кузатув кенгашининг қарорларига мувофиқ амалга оширади.

11.3. Бошқарув раиси ва Бошқарув аъзолари томонидан ушбу устав ва меҳнат шартномаси шартлари қўпол равишда бузилса, ёхуд Бирлашма бизнес-режасининг тасдиқланган кўрсаткичларни бажарилиши бузилган ҳолларда ва уларнинг ҳаракатлари

(ҳаракатсизлиги) натижасида Бирлашмага келтирилган зарарлари сабабли улар билан тузилган шартнома Бирлашма Кузатув кенгаши томонидан муддатидан илгари бекор қилиниши мумкин.

11.4. Бирлашма Бошқаруви 3 нафар аъзодан иборат бўлиб, акциядорлар умумий йиғилишининг ваколатлари ва Бирлашма Кузатув кенгаши ваколатларига киритилган масалалардан ташқари барча масалаларни ҳал қилиш ваколатига эга.

11.5. Бирлашма Бошқаруви таркибига Бошқарув раиси ва унинг қолган аъзолари киради.

11.6. Бирлашма Бошқаруви акциядорлар умумий йиғилиши ва Кузатув кенгашига ҳисобот беради.

11.7. Бирлашма Бошқарув раиси ва аъзолари Бирлашма Кузатув кенгаши томонидан бир йиллик муддатга сайланади (тайинланади).

11.8. Бошқарув аъзолари ва Бошқарув раиси билан меҳнат шартномаларни Бирлашма номидан Бирлашма Кузатув кенгаши раиси ёки Бирлашма Кузатув кенгаши ваколат берган шахс имзолайди.

11.9. Бирлашма ходимлари мазкур уставга ва амалдаги қонун ҳужжатларига мувофиқ Бирлашма Бошқарув раиси билан меҳнат шартномасини тузадилар.

11.10. Бирлашма Бошқарувига тўланадиган ҳақ миқдори Бирлашма фаолиятининг самарадорлигига тўғридан-тўғри боғлиқ бўлади ва шартномада белгиланган бўлиши керак. Тузиладиган шартноманинг шартлари Бирлашма Кузатув кенгаши томонидан тасдиқланади.

11.11. Бирлашманинг Бошқарув раиси вазифаларини бошқа ташкилотларнинг бошқарув органларидаги лавозим билан биргаликда эгаллаб туришга фақат Бирлашма Кузатув кенгашининг розилиги билан йўл қўйилади.

11.12. Бирлашма Бошқаруви раиси билан тузиладиган шартномада уларнинг Бирлашма фаолияти самарадорлигини ошириш бўйича мажбуриятлари ҳамда Бирлашманинг йиллик бизнес-режасини бажариш қандай бораётганлиги юзасидан акциядорларнинг умумий йиғилиши ва Бирлашма Кузатув кенгаши олдида берадиган ҳисоботларининг даврийлиги назарда тутилиши керак.

11.13. Бирлашма Бошқаруви акциядорлар умумий йиғилиши ва Кузатув кенгашининг қарорлари бажарилишини ташкил этади.

11.14. Бирлашма Бошқарувининг мажлиси зарур ҳолларда ўтказилади.

11.15. Бирлашма Бошқаруви мажлисида қарорлар мажлисда қатнашаётган Бошқарув аъзоларининг оддий кўпчилик овози билан қабул қилинади. Бошқарув мажлисида масалалар ҳал этилаётганда Бошқарувнинг ҳар бир аъзоси битта овозга эга. Овозлар тенг бўлиб қолган тақдирда Бирлашма Бошқаруви раисининг овози ҳал этувчи ҳисобланади.

11.16. Бирлашма Бошқаруви томонидан қабул қилинган қарорга рози бўлмаган Бошқарув аъзолари ўз фикрларини Бирлашма Кузатув кенгашига билдиришлари мумкин.

11.17. Бошқарув мажлисида баённома юритилади. Бошқарув мажлисининг баённомаси Кузатув кенгаши ва тафтиш комиссияси аъзоларига, шунингдек аудиторга уларнинг талабига кўра берилади.

11.18. Бирлашма Бошқарувининг ваколатларига қўйидагилар киради:

- мазкур устав ва Кузатув кенгаши томонидан ўзига берилган ваколатларга мувофиқ Бирлашманинг ишига самарали ва барқарор ишлашини таъминлаган ҳолда унинг жорий фаолиятига раҳбарлик қилиш;
- акциядорлар умумий йиғилиши ва Кузатув кенгаши қарорларининг бажарилишини ташкил этиш;
- ўз ваколатлари доирасида Бирлашманинг мол –мулки ва пул маблағларини тасарруф этиш;
- ўз ваколати доирасида мол-мулкни сотиб олиш ва мол-мулкни бошқа шахсга ўтказиш билан боғлиқ битимлар (умумий қиймати қарор қабул қилинган санада Бирлашма соф активларининг 15 фоизигача ташкил этадиган битимлар ёки ўзаро боғлиқ бир қанча битимлар) тузиш (битим тузиш масаласида Бирлашма Бошқаруви яқдиллигига эришилмаган ҳолларда битим тузиш тўғрисидаги масала Бирлашма бошқаруви қарорига мувофиқ Кузатув кенгаши ҳукмига ҳавола этилиши мумкин);

- Бирлашманинг таркибий бўлинмалар тўғрисидаги низомлар, ходимларнинг лавозим йўриқномаларини тасдиқлаш;
- Бирлашманинг ички меъёрий ҳужжатларини тасдиқлаш, акциядорлар умумий йиғилишининг ёки Бирлашма Кузатув кенгашининг ваколатларига киритилган масалалар бундан мустасно;
- Кузатув кенгашининг розилигига кўра унинг ишида маслаҳат овози билан иштирок этиш;
- Бирлашманинг тижорат сирини ташкил этувчи маълумотлар рўyxатини белгилаш;
- Бирлашма номидан битимлар тузиш (мазкур Устав ва қонунчиликда белгиланган тартибда), Бирлашманинг шўъба хўжалик жамияти ва филиаллари ёки ваколатхонаси раҳбарларини лавозимга тайинлаш ва лавозимдан озод этиш;
- филиал ва шўъба хўжалик жамияти фаолиятининг асосий йўналишларини белгилаш ва уларнинг бизнес-режаларини ва бажариш тўғрисидаги ҳисоботларини тасдиқлаш;
- Бирлашма филиаллари ва шўъба хўжалик жамиятларининг штат жадвалларини тасдиқлаш;
- Бирлашманинг Бошқаруви, қонунчилик, ушбу устав ва Бирлашманинг меъёрий ҳужжатларига мувофиқ бошқа ваколатларга ҳам эга бўлиши мумкин.

11.19. Бирлашма Бошқарувининг мажбуриятлари:

- Бирлашмани ривожлантириш дастурлари ва бизнес-режалари ишлаб чиқиш, уларни ташкил этиш ва бажарилишини назорат қилиш;
- Бирлашманинг ваколатли бошқарув органи томонидан тасдиқланган бизнес-режада кўрсатилган миқдорларда фойда олишни таъминлаш;
- Бирлашманинг таркибий бўлинмаларининг ўзаро самарали ҳаракатини таъминлаш;
- Бирлашма ходимларининг ижтимоий кафолатларига риоя қилинишини ва улар меҳнатини муҳофаза қилишни таъминлаш;
- ўз ваколатига тегишли ишларнинг ҳолати тўғрисидаги ахборотни акциядорларнинг умумий йиғилишига ва Бирлашма Кузатув кенгашига белгиланган муддатда тақдим этиш;
- Бирлашма акциядорларининг умумий йиғилишида қатнашиш, дивидендлар ҳисобланиши ва тўланиши бўйича акциядорларнинг барча ҳуқуқларига риоя қилиш;
- Ўзбекистон Республикаси қонун ҳужжатларига ҳамда Бирлашма ички ҳужжатларига риоя қилиш;
- Бирлашманинг Бошқаруви, қонунчилик, ушбу устав ва Бирлашманинг меъёрий ҳужжатларига мувофиқ бошқа мажбуриятларга ҳам эга бўлиши мумкин.

11.20. Бирлашма Бошқарувининг ҳуқуқлари:

- қонунчиликка, мазкур устав ва меҳнат шартномасига асосан ўзига тегишли ваколатларга мувофиқ, мустақил равишда Бирлашманинг жорий фаолиятида раҳбарлик қилишда туғилган барча саволларни ҳал этиш;
- Бирлашма номидан ишончномасиз иш юритиш ҳамда унинг манфаатларини бошқа ташкилотлар ва органлар олдида ҳимоя қилиш;
- Бирлашманинг Бошқаруви, қонунчилик, ушбу устав ва Бирлашманинг меъёрий ҳужжатларига мувофиқ бошқа ҳуқуқларга ҳам эга бўлиши мумкин.

11.21. Бирлашма Бошқарув раисининг ваколатларига қўйидагилар киради:

- ўзининг ваколатлари доирасида Бирлашманинг ишига раҳбарлик қилиш;
- Бирлашма Кузатув кенгашининг розилигига кўра унинг ишида маслаҳат овози билан иштирок этиш;
- Бирлашма шўъба хўжалик жамиятлари, ваколатхоналари ва филиаллари учун мажбурий бўлган қарор, буйруқ ва фармойишлар чиқариш;
- Бирлашма номидан ишончномасиз иш юритади, давлат муассасалари, барча мулк шаклларидаги корхона ва ташкилотларда унинг манфаатларини ҳимоя қилади;
- банкларда ҳисоб рақамлар, шу жумладан валюта ҳисоб рақамларини очади ва Бирлашманинг банк ва бошқа молия ҳужжатларида биринчи имзо ваколатига эга бўлади;

- ўзининг ваколатлари доирасида, корхона ва ташкилотлар билан шартномалар ва контрактларни имзолайди ва битимлар тузади;
- Бирлашма номидан амалдаги қонунчиликка асосан ишончномаларни беради;
- Бирлашма Бошқаруви раиси, қонунчилик, ушбу устав ва Бирлашманинг меъёрий ҳужжатларига мувофиқ бошқа ваколатларга ҳам эга бўлиши мумкин.

11.22. Бирлашма Бошқарув раисининг мажбуриятлари:

- қонунчиликка мувофиқ Бирлашмада бухгалтерия ҳисоби ва ҳисоботининг ташкил этилиши, зарур ҳолати ва ишончилигини, йиллик ҳисоботлар ва бошқа молиявий ҳисоботлар тегишли органларга ўз вақтида тақдим этилишини, шунингдек акциядорларга, кредиторларга ва бошқа олувчиларга юбориладиган Бирлашма фаолияти тўғрисидаги маълумотлар тақдим этилишини таъминлаш;
- Бирлашманинг молия-ҳўжалик фаолияти тўғрисидаги ҳужжатлар Бирлашманинг Кузатув кенгаши, тафтиш комиссияси ёки Бирлашма аудитори талабига кўра тақдим этиш;
- Бирлашманинг тижорат сирини ташкил этувчи ахборотларни сақлаш;
- хизмат ёки тижорат сирини ташкил этувчи ахборотнинг Бирлашма ходимлари томонидан сақланишини таъминлаш;
- Бирлашмани малакали кадрлар билан таъминлаш, Бирлашма ходимларининг билими, малакаси, тажрибаси ва қобилиятларидан энг яхши фойдаланиш чораларини кўриш;
- давлат статистика ҳисоботи ва бухгалтерия ҳисоботини тегишли органларга тўлиқ ва ўз вақтида тақдим этилишини таъминлаш;
- Бирлашма Бошқаруви раиси, қонунчилик, ушбу устав ва Бирлашманинг меъёрий ҳужжатларига мувофиқ бошқа мажбуриятларга ҳам эга бўлиши мумкин.

11.23. Бирлашма Бошқарув раисининг ҳуқуқлари:

- Бирлашма ходимларини ишга қабул қилади, улар билан меҳнат шартномаларини тузади ва бекор қилади;
- уларга нисбатан интизомий жазо чораларини қўллайди, ходимлар томонидан меҳнат ва ижро интизомини сақлаб туришини таъминлайди;
- Бирлашманинг барча ходимлари томонидан бажарилиши мажбурий бўлган буйруқ ва фармойишлар чиқаради ва кўрсатмалар беради;
- Бирлашма Бошқаруви раиси, қонунчилик, ушбу устав ва Бирлашманинг меъёрий ҳужжатларига мувофиқ бошқа ҳуқуқларга ҳам эга бўлиши мумкин.

11.24. Бирлашма Бошқарув раиси ва аъзолари ўз ҳуқуқларини амалга оширишда ва ўз мажбуриятларини бажаришда Бирлашма манфаатларини кўзлаб иш тутишлари лозим.

11.25. Бирлашма Бошқаруви мазкур устав ва акциядорлар умумий йиғилиши томонидан тасдиқланган “Ижроия органи тўғрисида”ги Низом асосида иш олиб боради.

12. БИРЛАШМА КУЗАТУВ КЕНГАШИ АЪЗОЛАРИНИНГ, БИРЛАШМА БОШҚАРУВ РАИСИНИНГ ВА БОШҚАРУВ АЪЗОЛАРИНИНГ ЖАВОБГАРЛИГИ

12.1. Бирлашма кузатув кенгашининг аъзолари, Бирлашма бошқарув раиси ва бошқарув аъзолари ўз ҳуқуқларини амалга оширишда ва ўз мажбуриятларини бажаришда Бирлашманинг манфаатларини кўзлаб иш тутиши лозим ва белгиланган тартибда жавобгар бўлади.

12.2. Бирлашмага зарар етказилишига сабаб бўлган қарорга овоз беришда иштирок этмаган ёки ушбу қарорга қарши овоз берган Бирлашма кузатув кенгаши аъзолари, бошқарув раиси ва бошқарув аъзолари жавобгар бўлмайди.

13. МИНОРИТАР АКЦИЯДОРЛАР ҚЎМИТАСИ

13.1 Миноритар акциядорларнинг ҳуқуқлари ва қонуний манфаатларини ҳимоя қилиш мақсадида Бирлашмада уларнинг орасидан 5 та аъздан иборат таркибда миноритар акциядорларнинг қўмитаси ташкил этилиши мумкин.

13.2. Миноритар акциядорлар қўмитасининг таркибига номзодлар бўйича таклифлар Бирлашмага Бирлашма кузатув кенгашига номзодлар бўйича таклифлар киритиш учун назарда тутилган тартибда ва муддатларда киритилади.

13.3. Миноритар акциядорлар кўмитасининг аъзоларини сайлашда акциядорларнинг умумий йиғилишида ҳозир бўлган ва Бирлашма кузатув кенгашига номзодлар кўрсатмаган ёхуд акциядорларнинг ўтказилаётган умумий йиғилишида кузатув кенгашига номзодлари сайланмаган акциядорлар иштирок этади.

13.4. Миноритар акциядорлар кўмитасининг таркибига Бирлашманинг бошқарув раиси, бошқарув аъзолари, шунингдек Бирлашманинг кузатув кенгашига ва тафтиш комиссиясига сайланган шахслар кириши мумкин эмас.

13.5. Миноритар акциядорлар кўмитасининг ваколатига қуйидагилар киради:

- акциядорларнинг умумий йиғилиши ёки Бирлашманинг кузатув кенгаши кўриб чиқиши учун киритилаётган йирик битимлар ва аффилиланган шахслар билан битимлар тузишга оид масалалар бўйича таклифлар тайёрлашда иштирок этиш;
- миноритар акциядорларнинг ўз ҳуқуқлари ва қонуний манфаатларини ҳимоя қилиш билан боғлиқ мурожаатларини кўриб чиқиш;
- қимматли қоғозлар бозорини тартибга солиш бўйича ваколатли давлат органига миноритар акциядорларнинг ҳуқуқлари ва қонуний манфаатларини ҳимоя қилиш тўғрисида мурожаатлар киритиш;
- қонун ҳужжатларига мувофиқ бошқа масалаларни кўриб чиқиш.

13.6. Миноритар акциядорлар кўмитасининг қарорлари оддий кўпчилик овоз билан қабул қилинади. Миноритар акциядорлар кўмитасининг мажлислари унинг миқдор таркибига сайланган шахсларнинг камида тўртдан уч қисми ҳозир бўлганда ваколатлидир.

13.7. Миноритар акциядорларнинг кўмитаси қабул қилинган қарорлар тўғрисида ҳар йили акциядорларнинг умумий йиғилишида ҳисобот беради.

13.8. Миноритар акциядорлар кўмитасининг раиси ушбу кўмита таркибидан миноритар акциядорлар кўмитасининг аъзолари томонидан кўпчилик овоз билан сайланади.

13.9. Миноритар акциядорлар кўмитасининг раиси миноритар акциядорлар кўмитасининг ваколат доирасига киритилган барча масалалар бўйича Бирлашманинг ҳужжатларидан фойдаланиш ҳуқуқига эга.

13.10. Миноритар акциядорлар кўмитасининг фаолият кўрсатиш тартиби қимматли қоғозлар бозорини тартибга солиш бўйича ваколатли давлат органи томонидан тасдиқланади.

13.11. Миноритар акциядорлар кўмитаси Бирлашманинг хўжалик фаолиятига аралашушга ҳақли эмас.

13.12. Миноритар акциядорлар кўмитасининг фаолиятига Бирлашма кузатув кенгашининг ёки ижроия органининг аралашувига йўл қўйилмайди.

14. БИРЛАШМА ФАОЛИЯТИНИ НАЗОРАТ ҚИЛИШ

а) Бирлашманинг тафтиш комиссияси

14.1. Бирлашманинг молия-хўжалик фаолиятини назорат қилиш учун акциядорларнинг умумий йиғилиши томонидан бир йил муддатга тафтиш комиссияси сайланади. Бирлашма тафтиш комиссияси сон таркиби 3 кишидан иборат.

14.2. Бирлашма тафтиш комиссияси аъзоларига доир малака талаблари акциядорларнинг умумий йиғилиши томонидан белгиланади. Айтилган шахс Бирлашманинг тафтиш комиссияси таркибига кетма-кет уч мартадан ортиқ сайланиши мумкин эмас.

14.3. Бирлашма тафтиш комиссиясининг фаолият кўрсатиш тартиби акциядорларнинг умумий йиғилиши томонидан тасдиқланадиган низомда белгиланади.

14.4. Бирлашма тафтиш комиссиясининг ваколатлари:

- молиявий ҳужжатларни ва бухгалтерия ҳисоби маълумотларини текшириш;
- бухгалтерия ва статистик ҳисобларни амалдаги норматив ҳужжатларга муносиблигини таҳлил қилиш;
- молиявий-хўжалик ва ишлаб чиқариш фаолиятида ўрнатилган норматив қоидаларга ва давлат стандартларига риоя қилинаётганлигини текшириш;
- Бирлашманинг молиявий аҳволини таҳлил қилиш, унинг тўлов қобилиятини, Бирлашманинг иқтисодий ҳолати яхшиланишига резервларни таъсирини таҳлил қилиш;
- солиқ инспекциясини, статистик ва бошқа давлат бошқаруви органлари учун тузилган баланс, ҳисобот ҳужжатларини тўғрилигини текшириш;

- акциядорларнинг умумий йиғилиши қарорларини таҳлил қилиш, қарорлар Бирлашманинг ҳужжатларига, яъни амалдаги қонун ва қонуности ҳужжатлар талабларига тўғри келмасликлари аниқланганда таклифлар киритиш;

- Бирлашма бошқарув органлари мансабдор шахслари, Бирлашма ижроия аппарати таркибий бўлинмалари раҳбарлари ва ходимларидан текширув мобайнида пайдо бўладиган масалалар бўйича ёзма тушунтиришлар олиш;

- Бирлашма бошқарув органлари мансабдор шахслари, Бирлашма ижроия аппарати таркибий бўлинмалари раҳбарларига аниқланган қоидабузарликлар юзасидан зудлик билан чоралар кўриш тўғрисида кўрсатмалар бериш, агарда бундай чораларни кўрмаслик қимматликларнинг, ҳужжатларнинг йўқ бўлишига ёки келгусидаги суистеъмолчилик ҳолатларининг келиб чиқишига сабаб бўлса;

- Бирлашма акциядорларининг навбатдан ташқари умумий йиғилиши чақирилишини, Бирлашма кузатув кенгаши мажлисларини ўтказилишини Ўзбекистон Республикасининг амалдаги қонунчилигида белгиланган тартибда талаб қилиш;

- Бирлашма бошқарув органлари мансабдор шахслари, Бирлашма алоҳида бўлинмалари ва Бирлашма ижроия аппарати таркибий бўлинмалари раҳбарларидан Бирлашманинг молиявий ва хўжалик фаолиятини текширилишини ўтказиши учун зарур бўлган ҳужжатлар ва материалларни сўраб олиш;

- Бирлашма бошқарув органлари мансабдор шахсларига Бирлашма ходимлари, шу жумладан Бирлашма бошқарув органлари мансабдор шахсларига нисбатан агарда улар томонидан Бирлашма Устави ва Бирлашма ички ҳужжатлари қоидалари бузилган бўлса, интизомий ва моддий жавобгарликка тортиш чораларини кўриш тўғрисидаги масаласини кўриб чиқишга киритиш.

14.5. Бирлашма тафтиш комиссиясининг аъзолари бир вақтнинг ўзида Бирлашма кузатув кенгашининг аъзоси бўлиши, шунингдек Бирлашмада меҳнат шартномаси (контракт) бўйича ишлаши мумкин эмас.

14.6. Бирлашманинг молия-хўжалик фаолиятини текшириш тафтиш комиссиясининг, акциядорлар умумий йиғилишининг, Бирлашма кузатув кенгашининг ташаббусига кўра ёки Бирлашма овоз берувчи акцияларининг камида беш фоизига эгалик қилувчи акциядорнинг (акциядорларнинг) талабига кўра Бирлашма кузатув кенгашини олдиндан хабардор қилиш йўли билан бир йиллик ёки бошқа давр ичидаги фаолият яқунлари бўйича амалга оширилади.

14.7. Бирлашманинг тафтиш комиссияси Бирлашманинг молия-хўжалик фаолиятини текшириш яқунлари бўйича ҳисобот ва хулоса тузади, бу хулосада:

- Бирлашманинг ҳисоботларида ва бошқа молиявий ҳужжатларида кўрсатилган маълумотларнинг ишончлилигига доир баҳо;

- бухгалтерия ҳисобини юритиш ва молиявий ҳисоботни тақдим этиш тартиби бузилганлиги, шунингдек молия-хўжалик фаолияти амалга ошириляётганда қонун ҳужжатлари бузилганлиги фактлари тўғрисидаги ахборот кўрсатилади.

14.8. Бирлашманинг молия-хўжалик фаолиятини текшириш яқунлари бўйича тафтиш комиссия ҳисобот ва хулосаси акциядорларнинг йиллик умумий йиғилишида эшитилади.

14.9. Тафтиш комиссияси Бирлашмада аффилиланган шахслар билан тузилган битимлар ёки йирик битимлар мавжудлиги, шунингдек қонун ҳужжатларининг ва Бирлашма ички ҳужжатларининг бундай битимларни тузишга доир талабларига риоя қилиниши тўғрисидаги хулосани ҳар чоракда Бирлашма кузатув кенгашининг мажлисига олиб чиқади.

б) Бирлашманинг ички аудит хизмати

14.10. Бирлашма активларининг баланс қиймати энг кам иш ҳақи миқдорининг юз минг баробаридан кўп бўлганда ички аудит хизмати ташкил этилади. Ички аудит хизмати Бирлашманинг кузатув кенгашига ҳисобдордир.

14.11. Бирлашманинг ички аудит хизмати Бирлашманинг ижроия органи, филиаллари ва ваколатхоналари томонидан қонун ҳужжатларига, Бирлашма уставига ва бошқа ҳужжатларга риоя этилишини, бухгалтерия ҳисобида ва молиявий ҳисоботларда маълумотларнинг тўлиқ ҳамда ишончли тарзда акс эттирилиши таъминланишини, хўжалик операцияларини амалга оширишнинг белгиланган қоидалари ва тартиб-таомилларига риоя этилишини, активларнинг сақланишини, шунингдек Бирлашма бошқариш юзасидан қонун ҳужжатларида белгиланган талабларга риоя этилишини текшириш ҳамда мониторинг олиб бориш орқали Бирлашманинг ижроия органи, филиаллари ва ваколатхоналари ишини назорат қилади ҳамда баҳолайди.

14.12. Бирлашманинг ички аудит хизмати ўз фаолиятини қонун ҳужжатларида белгиланадиган тартибга мувофиқ амалга оширади.

в) Аудиторлик ташкилоти (ташқи аудитор)

14.13. Аудиторлик ташкилоти Бирлашма билан тузилган шартномага мувофиқ қонун ҳужжатларида белгиланган тартибда Бирлашма молия-хўжалик фаолиятининг текширилишини амалга оширади ва унга текшириш яқунлари бўйича ҳисобот ҳамда аудиторлик хулосасини тақдим этади.

14.14. Аудиторлик ташкилоти Бирлашманинг молиявий ҳисоботи ва молияга доир бошқа ахборот ҳақидаги нотўғри хулосани ўз ичига олган аудиторлик хулосаси тузилганлиги оқибатида етказилган зарар учун Бирлашма олдида жавобгар бўлади.

15. ЯКУНИЙ ҚОИДАЛАР

15.1. Устав бўйича келиб чиқадиган барча низо ва келишмовчиликлар акциядорларнинг ўзаро келишуви йўли билан амалдаги қонун ҳужжатлари ва ушбу уставга асосан ҳал қилинади.

15.2. Низо ва келишмовчиликларни музокаралар йўли билан ҳал қилиш имконияти бўлмаган тақдирда улар тегишли равишда суд орқали ҳал қилинади.

15.3. Мазкур Устав Бирлашма Ўзбекистон Республикасининг қонун ҳужжатларида белгиланган тартибда давлат рўйхатиغا олинган вақтдан бошлаб кучга киради.

15.4. Мазкур Уставда назарда тутилмаган масалалар Ўзбекистон Республикасининг “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги қонуни ва бошқа қонун ҳужжатлари асосида тартибга солинади.

**“Samarqandpaxtasanoat”
бошқарув раиси**

НАВ

(имзо)

Қ.Ҳақбердиев

м.ў